


T 2259.7/1631



CHINESE - JAPANESE LIBRARY OF
HARVARD - YENCHING INSTITUTE
AT HARVARD UNIVERSITY
SEP 1 1938

國朝列卿紀卷之五十七

南京刑部尚書年表

趙

玘

河南祥符人舉人
永樂二十二年任

施

禮

順天東安人進士
宣德五年任

楊

寧

南直隸歙縣籍浙江錢塘人進士景泰二年任

薛

希璉

浙江麗水人進士天順元年任次年卒

耿

九疇

河南盧氏人進士天順二年任

蕭

惟禎

江西廬陵人進士天順四年任改南京兵部尚書

劉

孜

江西萬安人進士天順八年任

周

瑄

山西陽曲人舉人成化十四年任十七年致仕

哈佛大學漢和
圖書館珍藏印

張瑄 應天江浦人進士成化十八年任二十三年致仕

何喬新 江西廣昌人進士成化二十三年任本年改北

鄭時 南直隸舒城人進士弘治四年任

閔珪 浙江烏程人進士弘治八年任歷刑部尚書

戴珊 江西浮梁人進士弘治九年任改都察院左都御史

翟瑄 河南洛陽人進士弘治十年任十四年致仕卒

王繼 河南祥符人進士弘治十四年任改南京兵部尚書

陳道 南直隸盱眙人進士弘治十四年任十七年考滿

樊瑩 浙江常山人進士弘治十七年任十八年致仕

張敷華 江西安福人進士弘治十八年任改都察院左都御史

鍾蕃 浙江崇德人即潘蕃進士弘治十八年任正德元年致仕

何鑑 浙江新昌人進士正德元年任改兵部尚書

洪鍾 浙江錢塘人進士正德三年任改刑部尚書

吳洪 南直隸吳江人進士正德四年任

劉纓 江西新淦人南直隸蘇州衛籍進士正德五年任

孫需 江西德興人進士正德八年任改南京吏部尚書

陳壽 遼東寧遠衛籍江西新淦人進士正德九年任改兵部右侍郎致仕進陞未任

戈瑄 北直隸景州人進士正德九年任

金獻民 四川綿州人進士正德十五年任改兵部尚書

趙鑑 山東壽光人進士正德十六年任改刑部尚書

邊憲 北直隸任丘人進士嘉靖二年任改都察院左都御史

孟鳳 即臧鳳山東曲阜人進士嘉靖三年任

聶賢 四川長壽人進士嘉靖五年任歷刑部尚書

李承勳 湖廣嘉魚人進士嘉靖五年任改兵部尚書

方良永 福建莆田人進士嘉靖六年推未任

高友璣 浙江樂清人進士嘉靖七年任改刑部尚書

何詔 浙江山陰人進士嘉靖七年推未任改南京工部尚書

周倫 南直隸崑山人進士嘉靖七年任

聞淵 浙江鄞縣人進士嘉靖十二年任歷吏部尚書

周用 南直隸吳江人進士嘉靖十八年任歷吏部尚書

周金 南直隸武進人正德戊辰進士嘉靖二十年任改南京戶部尚書

顧璘 應天上元籍直隸吳縣人弘治丙辰進士嘉靖二十年任二十三年閑住

唐龍 浙江蘭谿人進士嘉靖二十三年起本部尚書未任歷吏部尚書

屠僑 浙江鄞縣人進士嘉靖二十四年任歷都察院左都御史

萬鏗 江西進賢人弘治乙丑進士嘉靖二十六年任歷吏部尚書

劉認 河南鄆陵人正德丁丑進士嘉靖二十八年任改刑部尚書

傅烱 江西進賢人嘉靖癸未進士嘉靖二十九年任三十年閑住

顧應祥 浙江長興人弘治乙丑進士嘉靖三十年由刑部調任

梁尚德 江西星子人嘉靖丙戌進士嘉靖三十三年任三十五年致仕

翁溥 浙江諸暨人嘉靖己丑進士嘉靖三十五年任三十六年卒

馮岳 浙江慈谿人嘉靖丙戌進士 三十六年任三十八年致仕

蔡雲程 浙江臨海人嘉靖己丑進士 三十八年任改刑部

盧勳 浙江縉雲人嘉靖三辰進士 四十年任四十二年致仕

趙大佑 浙江太平人嘉靖乙未進士四十二年任四十四年致仕隆慶元年起南京兵部未任

朱衡 江西萬安人嘉靖壬辰進士 四十四年推未任改工部

錢邦彥 南直隸吳縣人嘉靖乙未進士 四十四年任隆慶元年致仕

孫植 浙江平湖人嘉靖乙未進士 隆慶元年任三年致仕

黃光昇 福建晉江人嘉靖己丑進士 隆慶四年起未任致仕

陳其學 山東登州衛人嘉靖甲辰進士 隆慶四年任五年致仕

李遷 江西新建人嘉靖辛丑進士 隆慶五年陞未任養病

王國光 山西陽城人嘉靖甲辰進士隆慶 五年陞未任改戶部總諸尚書

謝登之 湖廣巴陵人嘉靖丁未進士隆 慶五年任萬曆二年改戶部

林雲同 福建莆田人嘉靖丙戌 進士萬曆三年起未任

趙錦 浙江餘姚人嘉靖甲 辰進士萬曆三年任

楊兆 陝西膚施人嘉靖丙辰進士 萬曆五年任六年改南兵部

何寬 浙江臨海人嘉靖庚 戌進士萬曆六年任

陳瑞 福建長樂人嘉靖丙 辰進士萬曆八年任

殷正茂 直隸欽縣人嘉靖丁 未進士萬曆十年任

陳道基 福建同安人嘉靖庚 戌進士萬曆十一年任

王廷瞻 湖廣黃岡人嘉靖己未進士萬曆十 三年由漕運尚書改任十四年養病

姜寶 直隸丹陽人嘉靖癸丑進士萬曆十四年任

陸光祖 浙江平湖人嘉靖丁未進士萬曆十六年任十七年改吏部

王世貞 直隸太倉人嘉靖丁未進士萬曆十七年任

魏時亮 江西南昌人嘉靖己未進士萬曆十八年以工部左侍郎陞任十九年卒於官

王用汲 福建晉江人隆慶戊辰進士萬曆十九年以吏部右侍郎陞任

南京刑部尚書行實

趙犴字雲翰河南開封府祥符縣人自幼嗜學進退動止如老成人既長游學郡庠已卓然於儕輩中洪武丁卯由郡薦入大學士嘗被命董事山東以廉謹受襲衣楮幣之賜歲庚午授兵部職方司主事命覈天下兵馬暨諸路屯戍補其缺而增所宜置悉得其實具圖以進 太祖以為能乙亥陞武庫員外郎慎密小心尤為當道者所重戊寅陞浙江右叅政剽繁治劇事無凝滯時海寇出沒劫取人財乃以計捕之境内獲安尋丁外艱吏民痛之如離父母壬午 成祖嗣臨大寶以能專對命使南交至則誕宣德音恩威兼布夷長欵服既歸却其金寶之餽

上聞而嘉之。賜賚優渥。擢刑部右侍郎。永樂二年。轉工部。再轉禮部。受命往封西寧侯宋晟。歸五年。冬。拜禮部尚書。賜宴於華蓋殿。并徹御筵。饌羞遺其母。以榮之。戊子。仁孝皇后崩逝。命詣北京卜山陵。告成。膺楮幣之賜。壬辰。督創隆慶保安永寧諸郡。治撫輯有方。而新集之民。悉安其業。不知其勞。七年。扈行在奏。言北京國子監開設七年矣。監生唐謙等情願出仕。吏部試之。皆未通經。宜罪司業趙季通。上曰。姑宥之。行文申明天下。凡弟子負再試不知文理者。併罪其師。發煙瘴地。回安置。丁酉。改兵部尚書。明年。以內艱去。已而起復。專理塞外兵政。疾作。上遣中官偕名醫往視疾。已入謝。復令調攝於家。既康。復命詣塞。

北訪牧地。遂具順川等處。以聞。於是出廐馬牧之。孳畜蕃息。壬寅。大駕北征。命督軍餉。指理有方。兵食充給。二十二年。仁宗嗣位。改刑部尚書。蒞事南京。居職六年。式敬由獄。宣德庚戌。力以疾辭。宣宗矜其賢勞。特賜致仕。既歸。汴構一室於東郊。名曰石泉茅屋。日與親友爲歡。以樂暮年。正統丙辰。七月。十有五日。以疾卒。年七十有三。狷儀度英偉。倜儻多才。善屬文。喜歌咏。有倉文集二卷。藏於家。

施禮字

順天府東安人。洪武丁丑進士。授行人司司副。三

十年。陞河南左叅議。未幾。以事奪職。革除。中起淮安府知府。復坐事。謫戍邊方。永樂二年。擢山東道監察御史。十一年。陞大理

寺右寺丞 命署行在大理寺事二十二年陞本寺左少卿洪
 熙元年命祭山西西海河瀆等神宣德元年復行在刑部右侍
 郎五年時光祿厨役訴其寺官竊減外夷供給通政司以聞
 上命禮執而治之因諭禮光祿之弊不止此勿謂飲食細故陞刑
 部尚書正統六年改本部為南京刑部七年致仕

楊寧字彥謐直隸徽州府歙縣人生穎異甫三歲祖父引至膝
 下口授以詩即應口成誦八歲能通大學語五十一能屬文十
 八即以春秋魁永樂丁酉京闈兩中乙榜不就宣德庚戌舉林
 震榜第二甲進士第一人尋 詔歸進學壬子赴召明年授刑
 部主事讞獄明恕蔚有時名正統己未麓川宣慰思任發反寇

虐隣境 朝廷命將征之簡文臣有才識者隨征寧其首也師
 次麓川境賊遣人款軍門約降主將欲許之眾莫不喜悅乃獨
 進曰不可兵未加而敵降是必詐以誘我也許之懼有後悔弗
 聽固請不已眾謂其迂檄令督運金齒不旬月賊眾奄至士卒
 多陷比還京將兵者卒以失機被譴寧獨以勞被 褒賞特陞
 郎中歲辛酉大舉伐麓川總督軍務兵部尚書王驥知其料敵
 之審仍以寧行師入境王公指授諸將進取方略以寧督戰乃
 渡江攻上江賊砦賊矢石如雨寧奮不顧身督戰益力士卒咸
 用命遂克之又進攻杉木籠山賊柵險拒守寧曰賊狃於前勝
 當多方以誤之使不暇併力乃可圖王公用其言令諸將並進

連破七寨斬陶孟靠等餘賊奔潰遂乘勢擣賊巢圍之賊以死守晝夜攻戰不息因乘風舉火烟焰漲天賊不知所爲死鋒鏑及墮厓溺水不計其數師還英宗親宴勞於奉天門賜白金楮幣拜刑部右侍郎壬戌丁母哀夫人憂甲子奉命參贊雲南軍務至則練兵伍督屯耕興利去害不以勢撓而於懷遠人獨盡心焉先是有頭目恭項者嘗效力隨征具奏請置隴川宣撫司以恭項爲宣撫用旌其義民皆悅服有言騰衝險要宜城之以控制蠻夷者上命往城或謂寧曰其地險惡多瘴非時冒之輒死盍徐圖之寧曰我知奉命而已遑卹其他卽往相地度工計財費勉勵將士使效力越四旬有五日畢工因建學舍

選生徒訓令務學以變夷風自爲文刻石紀其事人敬服焉先是麓川賊首逃于緬至是以城完民且效順謀所以致賊計乃簡銳師若將有所向者先遣奉詞責緬緬人懼哀求出賊自效卒誅大憝函其首以獻自是朝廷無南顧之憂丙寅侍郎侯璉代還朝丁卯暨戊辰春上以清明謁祭三陵俱命留守未幾閩浙東廣草寇竊發師征未寧江右密邇三境懼有侵軼患朝廷命巡撫至則按視郡縣當賊衝者增修城垣立排柵以斷要路團集鄉兵訓以武藝有侵軼者輒擊斬之以故賊聞風畏避不敢犯於是時益鎮以簡靜暇則遍歷諸郡宣上德達下情崇獎學校詢求民瘼而弛張之遠近畏慕景泰初還京奏對稱

旨有織金文綺羊酒之賜明日拜禮部尚書與毘陵胡濙協心政務濟寬以嚴人謂得體後二年以病足艱於步履調南京刑部示優禮也其在刑部凡五六年斷獄一用寬恕民以不寃天順改元致仕家居踰年以疾卒壽五十有九有白雲稿臥雲稿藏於家

薛希璉字廷器浙江處州府麗水縣人永樂癸卯以詩經領浙江鄉薦宣德庚戌登進士第尋詔歸進學後三年赴召觀政兵部拜貴州道監察御史負氣敢言不事訐直正統元年按治於河南克持風裁駸駸有時譽又明年巡京市場坊者四方百貨所聚也利博而奸生商賈患之京尹以爲言英宗命察之

不踰月而權豪罔利者屏息上下便之五年廷選憲臣俾奉璽書分行天下舉採荒之政而希璉直江西所至以便宜剗奸弊廣儲蓄增築陂塘以興水利變通有法寬猛得宜民悉賴之以故能聲益著事竣擢刑部右侍郎八月畿內廣平等府旱且蝗命往視之至則黜贓吏蠲逋負弛徵輸嚴令捕之蝗乃息是月大雨者三苗稿復蘇民以不流亡八年往理鳳陽等處屯田發奸摘伏無敢欺隱創造冊式宿弊一清軍民兩利十年巡撫直隸保定淮安等一十二府事有便不便者施罷不俟日尤急於宣上德達下情民用感悅十三年夏復往鳳陽賑民民饑以濟是歲閩寇鄧茂七作亂師征踰年始克之而郡縣凋弊尤甚命鎮

守其地撫輯人民既而殘寇羅不復起乃請調兵討之親總軍務晝夜籌度其間知賊黨迫脅者衆遣人抵其壘諭曰若等皆平民苟能自新吾當上請寬若罪不然吾當殄滅之無遺育乃已爾無悔不日降者數萬計先是有逃入海者聞之亦棄兵自縛詣麾下待罪悉釋之使歸田里其負固不服者縱兵擊之擒斬殆盡闖寇乃平以功陞刑部尚書景泰三年行考察政命往山東廉問以實罷黜貪酷者二百五十餘人項之山東旱蝗祈禱於泰山雨集蝗息經營賑貸活饑民百八十餘萬口是年賜誥進資德大夫正治上卿天順改元英宗復辟拜南京刑部尚書益感激用法明審而存心一以仁恕刑無冤濫二年卒於

官壽六十

耿九疇字禹範河南河南府盧氏縣人永樂甲辰進士宣德辛亥擢禮科給事中凡事務存大體有清操正統改元之明年大臣言兩淮鹽政之弊必得重名檢者理之於是推爲鹽運司同知巡行諸鹽場盡革宿弊公私便之復條奏數事曰均歲派節樣鹽二事遂著爲令癸亥丁母憂鹽場數千人詣闕乞留從之乃進陞鹽運使益循法責效廉名大著嘗坐水傍一童子曰水清不如使君之清因號恒菴以自勵十四年以註誤逮至京事白朝廷知其廉正特陞刑部右侍郎屢與司官辯疑獄不爲勢利所怵有婦誣其夫衆欲斷異九疇曰不可杖其婦而歸之

人服其當八月有邊警乘輿出巡命留守京師既而鳳陽歲
凶盜起復勅往綏之乃留英武飛熊諸衛軍耕守以杜姦寇
覬覦之心招徠流民七萬餘戶一方晏然兩淮漕政自九疇去
任多廢至是復屬兼理之於是奏罷易米法申飭條戒有加於
舊尋復勅巡撫江北諸郡益盡心宣布德意凡可以惠民者無
不極力爲之景泰初勅審錄諸郡大辟囚九疇曰洗寃澤物吾
所願也凡以情得原者二十六人有婦人來何菊家者既去而
死其家訟菊與弟殺之菊誣服驗其無實而釋之後知殺者果
讐人也人服其明三年代還適議關中重地守臣缺人特勅
以往既至革弊黜貪威望愈振初六部卿佐使外文移不得徑

下按察司以故偃蹇不受約首奏下之邊將請於臨洮諸衛添
取防兵朝廷下九疇議上疏言邊城士卒不爲少矣在爲將
者馭之何如耳果能嚴紀律精練習勤撫卹絕侵漁以養其銳
氣則一可當百加之以賞罰明信則人人自奮而醜虜不足慮
矣不然添兵何益徒冗食耳遂從之初邊民春夏就耕田作秋
冬移入具疏言邊將所以禦寇而衛民也今民自避寇而失恒
產將何爲哉乞委邊將以止移入不能衛者罪之民皆稱便

朝廷以九疇兼理戎政宜居憲職遂轉都察院右副都御史仍鎮
其地聞朝廷下有司買羊角以充燈費上疏曰昔宋神宗買
浙燈而蘇軾輒諫止之此忠臣愛君之至情也今買羊角製燈

無乃類是書曰不務細行終累大德遂止繼以災異下詔求直言復上疏曰天地間有必然之理有或然之數理可盡而數不可泥臣願陛下延儒碩以廣聰明公賞罰以別忠佞擇守令以惠黎庶簡將帥以固邊疆此必然之理不可忽也優詔答之天順改元英宗復位思九疇可大用顧侍臣曰耿九疇廉正人也卽召爲右都御史士類皆賀臺憲得人時子裕任給事中上言父子同在要地非宜遂改裕爲翰林檢討自幸遭遇思圖報稱首進五事曰崇廉恥以勵士風清刑獄以召和氣勸農桑以厚民生節糧賞以簡軍士任憲臺以振綱紀上皆嘉納之因勅戒風憲乃進御史告曰朝廷望治於憲職至矣各宜

操滌以副任使不然吾不汝貸衆皆悚息風紀爲之肅清時邊事不寧將臣怠命將率諸道御史劾之事泄返爲所訴置九疇等於理九疇引咎自當朝廷察非其罪出爲江西右布政使尋陞四川左布政使明年召爲南京刑部尚書先在職者流於諧俗有乖清議及至肅然自歸於正大天順四年卒年六十有五訃聞上深哀悼遣官諭祭於其家復令有司爲營葬事士大夫識與不識莫不惜之後謚清惠

大學士李賢撰神道碑云公天性孝友親終追思不忘遇亡日悲痛如初喪時事三兄恭而盡禮常修耿氏家業以昭先德平生慕司馬溫公爲人敦尚古道恥同流俗奉身節儉無他嗜好

公退居家惟焚香讀書而已。交人不泛，關節不至其門。雖權貴亦敬憚不敢犯。凡論事是非確然不撓，未嘗詭隨於邪正之辯。尤嚴坐是與衆寡合，累遭讒困賴。上知其所存，卒全之。

立齋錄云：天順初，都御史負缺，有行賂於權貴之門者，薦其名。上知其不可，問賢可以勝此任者。且曰：耿九疇何如？賢曰：陛下得其人矣。此人廉名素著，士林重之。未幾，九疇自陝西來，遂陞右都御史。上召見，戒諭諄切，深孚輿論云。

蕭維禎，名兆，江西吉安府廬陵縣人。宣德庚戌進士。天順四年任。七年改南京兵部尚書。詳南京兵部。

劉孜，字顯孜，江西吉安府萬安縣人。正統乙丑進士，授監察御史。十四年巡撫遼東，自指揮而下，殘虐部曲者，洗雪殆盡。本年九月也先犯京師，攻遼東。孜躬督邊將，嚴翼抗禦，監軍中貴潛與虜通，卽劾罷之。遼東城堡尚完固，而京師汹汹，有爲南遷謀者。孜馳章乞斬言遷者，首以安人心議與廷臣合。於是遷議遂止。景泰四年進山東按察使，劾章一上，郡守指揮多罷誅。軍民稱快。治行爲天下第一。天順四年入覲，賜宴禮部，受文綺之賚。陞山東左布政使。本年入爲都察院右副都御史，巡撫南畿。修文襄廢墜之政，時松江府有積荒田四千七百餘頃，皆重額久廢不耕，稅加於見戶。孜奏請召民開佃，不論原籍肥田畝，稅米三斗，瘠者二斗，謂之官租，不起科，不加耗。民驩趨之，蕪穢

盡闢不二年見戶加耗皆復舊又歲積羨米二十萬以備凶荒
召佃始於周文襄而成於攷立法周密至今行之松人謂是曠
秋糧加耗華亭每石始七斗至四斗五升上海每石始八斗五
升至六斗金花銀一兩初准米三石八斗其後准四石至成化
六年皆然又歲積餘米二十萬此荒蕪開闢之效也八年陞南
京刑部尚書以嚴率其屬久亦安之成化四年以疾休致歸舟
至嚴州富春山而卒

周瑄字德孚山西太原府陽曲人應天府江寧籍宣德乙卯登
鄉試會試中乙榜不就束書入太學以友天下士學益進正統
甲子用吏部銓授刑部江西司主事精究法意讞獄明審尚書

金濂於羣屬中獨愛重之凡大獄必以委之有死罪囚累訴其
枉乃微服訪之累月一日至城南聞村姥言其事果冤囚得釋
給事中翟讓御史劉訓給燕山左衛鈔誣官盜取下法司瑄辨
其誣丁卯奉命錄南北畿重囚所至多平反者己巳北征部屬
當扈從者率多託疾乃毅然請行被重創而還景泰初陞署河
南司郎中事有校尉受贓縱真盜而以宿讐寘其間欲陷之死
瑄力辨之校尉反坐嘗視獄有囚八百人時天暑懼有病死者
三日盡發遣之衆以爲片言折獄之才時刑部闕右侍郎吏部
推代之益盡心以洗冤澤物爲己任辛未陪幸大學有綵幣
之賚甲戌順天河間二府民饑勅往賑之二府素無畜積又連

遭大水乃條奏八事一裁省各處冗官二停徵當歲糧草三添減軍士糧草如舊四免追久負馬匹牛羊五暫罷供應柴炭夫役六皇莊湖泊之利恣民采取七招商中納鹽糧損其斗數八借水次官倉之粟濟民事下戶部不能皆從而招商借粟之說尤以爲難上聞詔特從瑄議瑄又爲之具耕牛種子以便於民時亢旱苗稿行部至武清懇告于上下神祇是夕大雨明日至滄州致仕尚書馬昂家居謂曰昔有御史雨今爲侍郎雨矣秋大熟天順戊寅陞左侍郎二品襲衣之賜癸未命掌工部事又命掌都察院事成化乙酉改元命祭告中鎮霍山及晉代潘三府未還陞右都御史總督南京糧儲至則嚴告戒祛宿弊有侵

盜爲奸數輩悉懲以法謫戍遠邊倉場爲之肅然南京守備大臣輒欲校斛乃上疏劾其非六科十三道復交章論之由是守備者被切責乃已未幾上南京城守事宜八條及每歲朝京多所建明戊戌南畿糴貴詔發京庾之粟賤鬻之以平其價民食不艱畿輔乃安是歲陞南京刑部尚書告戒諸司事非會勘者不得出五日以是無冤滯之囚嘗值獄瘟輕罪悉縱遣之曰有事則召對歡聲載道南部起自洪武間至是傾圯乃請重修益以私享之錢辛丑以考滿乞休致不允繼又上章皆不允至冬復以三載滿入見准致仕先世業鑿無田產又久住金陵樂其風土遂仍歸江南寄籍江寧日與故人親戚飲燕登眺甚樂

至甲辰五月六日卒享年七十六瑄德性寬宏氣度詳雅脩髯長身議論英發平生所歷官皆循序而得不枉道以干人在國子時同堂生居相鄰喪妻無所得槥瑄因家人送貲費至傾橐與之爲主事時有罪人貧不能輸官紙將鬻幼子訣別不忍聞乃以折糧絹償其直還其子事親最孝遇時節老年猶悲泣出入兩京法司幾四十年無毫髮傷人害物至於領賑貸督京庾活民利國之功尤多故位登八座壽幾八袞子孫二十餘人策名甲科聯官清要如文端公經尤爲名臣

張瑄字廷璽應天府江浦縣人正統間爲縣學生始業舉子受禮經於姊夫李侃尋中應天府辛酉鄉試刊行經義於錄明年同李登壬戌進士觀政戶部李後官至都察院僉都御史仍以師禮事之終身奉李恭人如其母未嘗少衰甲子授刑部四川司主事時司寇俞士悅待屬甚嚴每稱其賢能以勵諸司戊辰以外艱去職景泰辛未服闋仍除湖廣司主事明年陞本司員外郎時太子少師兼吏部侍郎江公淵奉命南京等處公幹奏瑄才能欲與之俱適江以憂去不果是冬陞本部四川司郎中癸酉陞知吉安府吉安民素號健訟日不下數十百人決斷如流且屢辯疑獄痛革吏弊發奸摘伏如神吉民畏服然吉俗信鬼歲刻木以像神且冠裳聚衆迎送以徼福澤力禁之弗聽出遇諸途遂叱令棄像水中民首倡者悉寘諸法無何遘重疾

郡之長老皆曰神爲祟也請復之瑄執弗許病亦尋瘥郡民給路引者前例每引取銀四分謂之堂食前守悉爲已有乃遵舊制祇收楮幣一貫仍爲公費丙子夏郡大饑具申上司不候報輒發廩以賑民賴存活者多郡學諸生有匱乏者輒分俸給之若彭教羅倫曾彥輩皆魁甲科爲名宦實所造就者也僚屬廉而貧者家有婚喪皆設法以助之又建閣於學以藏御書建祠於郡以祀忠節文廟府治橋梁道路皆修治完整公私一新時巡撫都御史韓雍氣焰烜赫郡邑望塵羅拜惟瑄不爲屈居官剛正嚴明吏部每考治績恒居天下第一天順庚辰遂由郡守陞廣東右布政使去吉之日老稚扳留不獲存其靴郡中後人

復建亭刻石以圖不朽及至廣會廣西流賊越境攻破屬邑連山督官軍擒殺賊首莫文章等築城堡改邑治民賴以安賊徒周公轉等嘯聚於陽江縣黃江屯歲久道路不通新興縣頑民鄧李保糾結流賊殺害流民逋負糧差者幾二十年官不敢詰皆剿除之甲申流賊復來劫掠民被害尤甚復會兵追殺賊乃遁去大藤峽蠻賊屢肆猖獗朝廷兩度出師頒給綵段銀牌等件以旌軍功累受綵段一十八疋銀牌一十四面特賜大紅織金雲鶴衣一襲銀錠寶鈔尤多又嘗躬督各屬造預備倉六十二處修理陂塘圩岸四千六百六十六處修築廣州新會等府縣城垣一十二處廣袤尋丈若干甃以磚石俱因民利而利

之無一怨者。戊子轉左布政。先是各該吏典知印巡差會同巡撫三司等官叅撥瑄曰：此布政使司事也。專之人莫敢侵。巳丑冬滿九載當赴京。軍民千餘奔走乞留。於是巡撫鎮守等官交章薦其學行才識。剛方仁惠。乞留再任。以慰民情。詔可其奏。辛卯。朝廷賜誥命。有操存端方。才識通敏之褒。封贈三代壬辰奉。勅陞都察院右副都御史。尋出巡撫福建。初所屬郡縣多無糧儲。命各建倉廩。勸富民出粟。以備凶荒。民至今賴之。沿海官軍先因事減支俸糧三十餘年。遂以爲例。瑄知其故。令仍舊支給。官軍感惠。立石頌德。閩安鎮出海有二港。勝國時有鐵索橫絕港口。以禦海寇。歲久廢沒。奉命所司造鐵索三。每索長

百有餘丈。兩岸維以鐵椿。中以船二十隻駕之。小港如大港之制。而索差短。由是海寇絕跡。不敢往來。山海寇林壽六。魏懷三等。攻劫鎮城。歲久不獲。其鎮守等官屢被劾責。瑄至盡皆成擒。福安壽林等縣地隣江浙。強賊羣聚。阻塞道路。乃擒賊首葉旺。葉春。餘黨盡散。朝廷勅諭有處置得宜之褒。鎮守太監盧朦。暴橫瑄。裁抑之事聞革。去鎮守。人民稱快。閩俗信陰陽。拘忌有殞於家十載餘者。督屬責葬。不數日出葬者七千餘棺。甲午秋。又奉。勅巡撫河南。風紀益振。諸司少有不職。或知之。輒惶謝罪。時按察使何喬新。副使陳選。並有廉能聲。奏聞旌異。後俱至大用人。謂有知人之明。河南軍糧二十七萬石。先存元城縣地。

方交允瑄以爲元城非河南所屬難鈐制改置倉於彰德水次軍民稱便乙未秋以例入京議事因奏時宜若安插流民責成守令修舉武備甄拔滯才等一十八事該部皆議而行之河南大饑發廩賑濟仍於城四門及各寺觀設粥以給饑者出官庫衣布以給寒者無居址者查關廂空屋土窰以處之活民不啻萬數戊戌改南京刑部左侍郎因見廣東司事繁卽添主事一員累歲繫逮罪囚不旬月間各得其情問擬如律自是獄無冤滯壬寅秋以都御史侍郎通九載考滿赴京陞本部尚書南京御史何舜賓等坐犯贓罪徽州富民許通叟強入田當道爲之請囑不聽咸正以法丁未春以齒七十有一上章乞謝事退

而家居尋卒年七十八平生所著有香泉稿二卷粉署餘閒稿一卷凝清集八卷閩汴紀巡錄十七卷奏議八卷南征錄三卷安拙類稿若干卷

何喬新字廷秀江西廣昌人景泰甲戌進士歷刑部左侍郎成化二十三年任上言沿江蘆州率爲中官占據有訟者輒云買物進奉今陛下旣罷貢獻宜以蘆洲還民大忤中官意僅二月改北

鄭時字宗良直隸廬州府舒城縣人景泰辛未進士授山西道監察御史以能稱出按湖廣江西所至風裁凜然彈劾不避權倖天順五年爲用事者所忌左遷河南內鄉縣知縣拓城郭增

水利興起教化有異政成化元年擢知福建延平府政尚嚴明
禱雨輒應民爲立應雨亭紀之去任更名曰去思三年丁亥父
母繼歿卽刻奔訃廬墓三年有白兔馴擾之異有司上其事追
而止之會歲饑發廩爲粥里人貸券悉焚之六年服闋改知福
州十三年遷四川左叅政十五年進按察使十七年轉湖廣左
布政使聲聞益著十九年擢都察院右副都御史巡撫陝西大
饑人相食百方賑恤且言於上得內帑銀四十萬以濟旣至
乃命布政等官分守城門給散無敢漁者朔望必至文廟行香
講書人問其故時曰方今人情洶洶吾旣賑之復儆省以大義
亂何由起又符移六道周諏民隱疏平涼利民渠民多感之江

南湖襄等處盜起遣人諭之多解散擒其渠魁戮之更奏於寧
羌分水嶺號川平安砦此處設縣巡司以便統屬成化二十二
年因左道惑衆嬖倖因之以階進取上言利國保民五事一曰
盡誠敬以回天意二曰明理義以杜妖妄三曰減進貢以蘇民
困四曰息傳奉以抑僥倖五曰重名器以待有功辭多切直觸
時諱尋有貴州左叅政之謫忻然就道陝西之民如失父母所
至遮道不得行至有繪像以祀者弘治改元孝廟嗣位嘉其
忠蓋陞左副都御史撫治鄖陽本年改撫湖廣三年轉南京兵
部右侍郎四年進南京刑部尚書留心政務益大厥施讞獄必
求其情矜疑者輒辯之一時無稱寃者八年屢疏請老詔允

國朝反雅集 卷之五十一 四十八
之命給尚書誥命以歸爲人嚴重狷介百無所好惟好施予處人以恩信不忍言人過敷歷中外四十餘年廉慎之行始終如一優游桑梓數年清節不改以壽考令終鄉人無分遠近咸哭吊之

閔珪字朝瑛浙江烏程縣人天順甲申進士授山東監察御史屢劾大臣之不法者罷之成化六年擢江西按察司副使丁憂已而起復改廣東進按察使二十一年江西南贛盜起擢都察院右僉都御史巡撫江西左遷廣西按察使弘治初復都御史巡撫畿甸經理儲備修濬城濠尋進刑部侍郎四年以右都御史總督兩廣軍務八年進南京刑部尚書本年改左都御史詳

刑部

戴珊字廷珍江西浮梁縣人天順甲申進士成化二年擢四川道監察御史奉勅督南畿學校正身率之羣士帖服十四年陞陝西按察司副使仍專督學政又修古聖賢祠墓增秩祀典德教風行在陝久待諸士如家人父子諸士亦愛慕不忘稱誦至今久之陞浙江按察使秉法嚴正務崇大體其祇身無衆寡無大小俱中矩矱識者稱其端綆雅飭不負軒公輓云踰二年進福建右布政使尋轉左自奉儉約無他嗜好終任不持閩中一物弘治二年陞右副都撫治鄖陽時諸府豪右多窟流聚爲利乃刻日令首罪民所闢田多匿稅略償所費而沒其餘嚴練

兵伍自製爲營陣法蜀盜野王剛流入湖廣竹山竹谿又據漢中
中平利西鄉諸郡縣凡五年守臣莫敢發珊請令四川湖
陝三省調兵誅之所向克捷誅其首惡縱其餘黨事遂定辛亥
召爲刑部右侍郎與尚書何文肅公喬新彭惠安公韶俱以時
望相與同心一德期敬獄以長我國家於奏案之成務洗冤抑
凡正人受禍者雖忤旨不避若大奸宿猾法所難宥屢請弗
已也久之轉左命勘荆府不法事廷可其議九年遷南京刑
部尚書留都私人奸法能訛是非珊慎三尺宣幽達滯皆犁然
當人心又雅重鎮定足爲士類典刑十三年召改左都御史掌
都察院事

翟瑄字

河南河南府洛陽縣人天順甲申進士授奉化知

縣六年丁憂八年起復擢浙江道監察御史十五年丁憂十八
年起復補山東道御史十九年冬陞南京大理寺左寺丞二十
三年陞都察院右僉都御史本年改撫山西弘治四年陞都察
院右副都御史管院事九年陞南京右都御史掌院事十三年
陞南京刑部尚書十四年致仕卒贈太子少保

王繼字述之河南開封府祥符縣人成化丙戌進士授雲南道
監察御史七年陞陝西按察司僉事十年陞陝西副使十五年
陞山西按察使十六年丁憂二十年服除補福建按察使二十
二年陞山西右布政使二十三年陞都察院右副都御史巡撫

福建地方弘治三年改撫宣府地方本年又改撫甘肅地方五年陞南京兵部右侍郎九年陞戶部左侍郎總督倉儲十年陞戶部尚書仍督倉儲十四年陞南京刑部尚書本年改南京兵部尚書叅贊機務詳南京兵部

陳道字德修盱眙人天順壬午領南畿鄉薦甲申遂第進士成化元年授吏部文選司主事未幾坐累調南京刑部歷員外郎郎中清謹守法門無私謁都人因有板陳之號刑部諸司惟廣東最稱繁劇道司獄無留滯時莊懿周瑄爲本部尚書雅重之推總諸司章奏一時僚友有疑事咸就正焉丁酉值內艱十六年服除改南京兵部武選甫餘年擢知浙江金華府府民多健

訟牽連動數十人至則庭訊之不數語盡得其情所牽連者隨皆釋之有巨豪屢起大獄官司追捕輒身負黃袱聲言上訴衆畏之如虎乃召至置於法卽伏辜無異辭府獄故在治外人得出入狡獪之徒肆爲教誘乃命限以高垣有古木當垣合抱民祠以爲神伐之適有小疾或以神之靈恐道不爲動樹竟伐而疾良愈在府七年凡政之善皆類此弘治戊申遷陝西江西右叅政剽煩治劇益盡其心嘗分守湖南道得吏民之尅害者十數人悉加重譴他郡邑聞其風咸憚之壬子遷雲南右布政使踰年轉陝西左布政使所至輒有能聲乙卯進擢都察院右副都御史奉勅巡撫河南具疏陳地方利害謂彰德府等與山

西直隸錯處水旱之餘民多爲盜宜專設武臣陳州境隣直隸
潁州數百里盜所出沒宜增添縣治黃河之決河南爲上源而
患及直隸大名府等處濬治夫役宜屬之河南事下公卿議
奏多從其言又以宗室分封河南爲繁衍而無籍之徒出入其
第肆爲撥置貽患甚大乞嚴加禁約以篤親親尤人所難言迄
今語地方事宜者賴之戊午召爲刑部右侍郎未幾轉左庚
申陞南京都察院右都御史掌院事踰年改南京刑部尚書久
職刑名凡獄訟之輕重悉取案牘顛末閱之詳允而後行死獄
尤慎必求其生而不可得始獄故一時囚犯鮮有稱冤者癸亥
冬滿三載將考績過京值寒疾卽上疏乞休卒年六十有九訃

聞詔贈太子少保爲人沉靜寡言與人交及取予皆不苟爲
政雖尚寬厚至於臨大事治大獄則不舍晝夜思之期於當而
後已嘗以書示其子曰先王所謂煦煦爲仁孑孑爲義皦皦沽
名庸庸保祿近世士大夫之急於進取者往往涉此吾平生諸
不及人獨幸不在此四者之列亦不願汝曹效之子大章成化
甲辰進士終南京太僕寺少卿

樊瑩字廷璧浙江衢州府常山人幼敏悟篤學未冠知自勵屏
居山寺潛心義理冬不爐夏不扇者凡三年景泰丙子一舉捷
鄉闈天順甲申登進士引疾歸養久之拜行人司行人奉使西
川餽金不受上官作却金亭以表其清成化庚寅擢監察御史

山東盜起奉 璽書追剿不逾月得其首以歸清理淮揚軍所
條畫事宜至今爲例已亥按雲南以檄諭交人中其要害交人
懼而納款中貴人左右撓法衆爲瑩難之瑩至開誠與語爲定
要束有犯者痛繩之曰吾爲爾息言也貴人悟而自戢後卒以
善去德之終身丁憂服闋知松江府松賦重役繁自周文襄公
後法在人亡弊蠹百出其大者運夫耗折稱貸積累權豪索債
無虛歲而倉場書手侵盜害人虛人詭出移新蔽陳衆皆知之
而未有以處瑩至晝夜講畫盡得其要領曰運之耗以解者皆
齊民無所統一利歸狡猾害及良善而夏稅軍需糧運綱費與
供應織造走遞之用皆出自秋糧餘米既收復糶展轉迂回此

弊所由生也乃請革民夫俾糧長專運而寬其綱用以優之稅
糧除常運本色外其餘應變易者盡徵收白銀見數支遣部運
者既關係切身無敢浪費掌計之人又出入有限無可蔽藏而
白銀入官視輸米又率有寬剩民權趨之於是積年之弊十去
八九而田野之間無復睢突叫呶之患考尋文襄立法初意舉
其偏弊而通融之以爲經久之計如清水鄉竈丁草蕩以絕富
人之兼并革收糧囤戶以潛消長之侵漁取布行人代糧長輸
布而聽其齎持私貨以贍不足皆有惠利及民而公事沛然以
集巡撫使下其法如他州俾悉遵之以母憂去在官甫二載松
民懷之至今弘治初 詔天下舉異才南京工部侍郎黃孔昭

以瑩應。詔稱其明慎廉潔，堪任臺憲。吏部尚書王恕聞之，喜曰：「薦人當如是矣。」將驟用瑩，而未得其所。庚戌，起知山西之平陽。明年春，卽以爲河南按察使。時河溢境內，漂流數萬家。瑩躬莅賑卹，所全活甚衆。河南錢穀於北州爲浩穰，巡撫徐恪欲考見本末，而衆難之，以問瑩。瑩曰：「視萬猶千，視千猶百，夫何難。顧非職耳。」徐公舉瑩，於是部吏鈎考旬日間，宿蠹一清，衆皆服之。七月，陞應天應尹。京府素稱難治，而守備蔣琮者，尤怙寵作奸，與言官奏訐，連歲所蔓引罪黜甚衆，而事終不決。瑩承命推鞫，初若不與異者。琮覘知之，不爲意。最後及山陵龍脉事，琮遂得罪去。瑩在府屢治大獄，舉法不阿。類若此，是舉衆尤稱快。謂

絕類王沂公之去，丁謂云：「應天故有常例，錢數千緡以給宴勞。」瑩至，悉罷歸之。民及壬子鄉試，乃出其在官者助塲屋費。是歲陞南京工部右侍郎，尋改都察院左副都御史，巡撫湖廣兼理軍務。錦田賊與兩廣徃徃，爲寇聚衆幾三萬人。瑩謂賊如此，理不可盡殺，不開其生路，將致死於我，乃下令除首惡，必擒餘悉貫不問。賊聞之，稍稍散去。遂得其倡亂者十八人，置之法。而牒其餘歸本貫，兵不血刃。一方以寧。於是巡屬水旱連二十州，而諸藩府繕修未息。公私困弊，衡州等處且乏鹽。瑩奏通廣鹽收其餘利，以助工作，給賑濟。又奏停綾紗紙銀數萬兩，奏減襄府琉璃瓦料，以常瓦參之。奏止安陸州展北城，以益藩府地。凡省

費數十萬故年雖侵而民不甚困以疾乞休致總兵官鎮遠侯顧溥上疏懇留謂瑩在湖湘官吏畏其威軍民懷其惠疾不至甚政賴以和從之將失衆望而瑩請不已章三上許歸就醫藥閑居七年未嘗入城府家遵教飭無絲毫過知衢州府沈杰御史石玠張恕鄧章等交章論薦大學士長沙李東陽尚書鈞陽馬文升華容劉大夏都御史浮梁戴珊輩亟稱之於朝辛酉以舊官起撫治鄖陽改南京刑部右侍郎十六年兼都察院左僉都御史巡視雲貴時年幾七十矣單車屏從躬訪利弊雖巖阻瘴癘人迹所不到之處一一履行奏劾鎮守及巡撫官罪狀黜不職文武吏千數百負修城池勵兵馬賑貧窮撫流散威惠

大行有爲土官奪其牛不還者聞瑩至走愬之瑩還其狀曰汝第歸彼今歸汝牛矣已而果然且詣瑩伏罪瑩慰而遣之他土官聚兵仇殺且攻城有司不能制以白瑩瑩曰吾在賊敢爾耶不去當直擣其巢穴舉其族覆之聲聞卽歛兵退其爲蠻夷所畏服如此召爲南京刑部尚書疏決無滯犴獄幾空乙丑夏晨興若有所發寤遽上章乞致仕有老成清慎之褒月廩輿夫之賜逆瑾用事摘其勘隆平侯承襲事落職爲民又以守松江日裁減官布以蘇困事責輸米五百石瑩怡然受命然自是家益貧戊辰以疾終又明年瑾誅詔書盡復其官秩爲人誠慤簡易不事邊幅於世味澹然未嘗有所好布衣蔬食僅適口體陋

室敝廬僅取蔽覆鄉隣老穉耕夫牧豎見者皆接以欵誠至或
拍肩而與之問對蓋自質任自然如此而聰明果決遇事立斷
通而有介正而不迂在言路抗顏直論聞者縮頸更兩郡食俸
飲水去之日一物不以自隨宦途來往四十年水行單舸陸走
隻輪而已一時正人君子雖交口稱之而沮之者亦力瑩常先
覺急流中輒勇退故不爲所制而卒能全其高居家孝弟事父
素軒意誠色順未嘗有違忤從兄早世撫其孤不異已生子孫
皆授以恒業愛而能勞農月盛暑坐竹堦使舁行田間曰非徒
視稼將以勤之也故瑩雖處高位而子孫皆朴愿力學無貴驕
氣由教使然也爲文章若不經意而詞藻秀發體裁簡嚴遺稿

數百篇皆可諷誦尤精藻鑑留意人材至松江首濬日月河使
通舟楫曰吾聞此河通狀元出也明年錢福薦南畿後一舉遂
魁天下其他後進經識拔者多知名邪說異端無所信入疾且
革深以爲戒曰吾平生所爲無不可與鬼神言者卒之日門前
地忽陷有聲如雷亦可以見其所感矣年七十五贈太子少保
謚清簡

張敷華字公實號介菴江西吉安府安福縣人十八年任南京
刑部尚書尋以人望召改左都御史掌都察院事詳都察院
潘蕃字廷芳初氏鍾後復本姓浙江嘉興府崇德縣人成化丙
戌進士授刑部主事歷負外郎郎中陞知安慶府以嚴明爲治

境內肅然。歷貴州左叅政、山東右布政使、湖廣左布政使。弘治九年，陞右副都御史，巡撫四川。十一年，陞南京刑部右侍郎。十二年，改南京兵部右侍郎。十五年，陞右都御史，總督兩廣用兵。有方略，征勦南海黎賊，所至克捷。平岑濬，誅黃紹，擒黃文昌。十八年，陞南京刑部尚書，累疏乞歸，行裝蕭然。剛方清介，與時寡合。先是，數忤中官及逆瑾用事，矯制遣官校捕之，即日就械繫。上道觀者，莫不流涕。蕃不爲動，與劉忠宣大夏謫戍甘肅，瑾誅放歸，復其官。既卒，世廟詔賜塋祭。

何鑑，字時光，浙江新昌縣人。成化己丑進士。六年，授宜興知縣。十年，擢山東道御史。十七年，陞河南府知府。二十三年，陞山東

左叅政。弘治三年，陞四川右布政使。五年，陞四川左布政使。六年，歷陞都察院右副都御史，巡撫應天等府。八年，丁憂。十年，再起原職，巡撫山東地方。十二年，陞刑部右侍郎。十三年，陞刑部左侍郎。十五年，丁憂。十八年，再起刑部左侍郎，兼都察院左僉都御史，處置湖陝河南等處流民。正德元年，回部管事。本年，陞南京刑部尚書。未任。二年，改南京兵部尚書，詳兵部尚書。

洪鍾，字宣之，浙江錢塘縣人。成化乙未進士。歷福建左布政使。弘治十一年，陞右副都御史，巡撫順天等府地方，兼飭薊州等處軍務。十七年，改撫雲南。尋改貴州。正德元年，遷總督漕運，兼鳳陽等處。二年，陞右都御史，仍兼漕事。三年，改南京都察院右

國朝及明紀 卷之五十一
四百七十一
都御史掌院事。本年陞南京刑部尚書。未任四年。改工部尚書。詳都察院。

吳洪字禹錫。直隸蘇州府吳江縣人。少穎拔。年十二補縣學弟。子負。動必循理。嘗與同舍生奉詔下屬司開讀。旁近富人欲招致宴飲。而其嗣涉倨。同舍生以貧故弗校。洪曰。此非所謂噉爾之食耶。謝不往。學官有過嚴者。諸生至愬於御史。欲逐之。洪曰。師與父同。可叛乎。卒不署名。識者已知必爲遠器。年二十四舉成化辛卯應天鄉試。又四年登乙未進士科。初授南京刑部主事。歷負外郎。郎中。諸所聽斷。都人無不屈服。有疑獄。大司寇必屬之。洪恒存欽恤。因病輒捐俸爲糜啖之。丁未陞貴州按察

司副使。南都郎屬有此遷實。自洪始。蓋冢宰李裕在南臺知之深也。未幾以內外艱居喪五年。癸丑服闋。改廣東巡視海道。海濱素稱利穴。或攝醮政。則亦有私其羨利。而商以遲留反受颺風之患者。至洪秋毫無犯。弊革且盡。粵人歌之。御史王哲欲葺諸公署。而費無從出。請籌之。洪曰。鹽司有舊引若干。爲權豪所專。不及於商。今請以給商。或得錢數十萬。而其事濟矣。如其言。所費遂給中官守兩廣者。令四驛各以一舟供役。敝又令輸金已而兩徵之。民益不堪。御史汪公宗器將革之。且欲追所得之金。洪曰。往者不可追。追之已甚。况未必能追乎。第自今釐正。勿病吾民足矣。如其言。而中官帖然。有叔姪同行異宿。其叔宿樹

下爲漁人所殺投池中。任意其宿於別館也。訟館人及池旁居者數家械繫且死。衆莫能辯。洪以計廉得其情。乃以漁人償死。盡破械脫諸冤者。人以其爲神。官軍濫殺邀賞。諸死者之家以冤聞。遣按驗。悉心推訪。盡正濫殺者之罪。尤尚儒術。所至進諸生試之。凡經賞識。多中高第。己未陞福建按察使。頗行有闡。帥以犀珠走間道爲餽。力謝之。帥曰：公去矣。某無所干。且人無知者。何損公名。洪曰：若意善矣。然非知我者也。卒不受。閩俗囂訟。聽之必以其情。民率悅服。明年建寧延平大水。民貧且互劫。輒便宜粟賑之。汀漳軍餉缺。盜賊蜂起。乃取征商之羨賑之。而民始安。土徭戍者有所索。守臣集三司議焉。洪曰：不與則致叛。與之

則爲例。不若以貨爲名而姑與之。羣僚歎服。富家之主嘗乘兜他出。以一奴隨。中道忽棄兜與奴。返步遣奴歸還。則爲典財者所害。主家訟奴及二傭之昇者於官。奴曰：傭見吾歸而殺吾主。傭曰：奴引主去而殺之耳。吏莫知所坐。洪曰：三人者同發。主家顧不畏其家屬而中道殺主乎。訪其里嫗。知典財者有手血。濺衣之迹。捕其人。寘於法。布政司之吏有微罪。鎮守中官銜其使。欲重吏罪以爲使累。洪厲聲曰：殺人以媚人。吾不爲也。其遇事類多如此。辛酉入爲太僕寺卿。時方多事。乃正羣僕修馬政。邊陲倚之。乙丑進工部右侍郎。督理易州山廠。於薪炭羨餘。及公園邸舍之息。一無所取。正德丙寅遷左侍郎。入視部事。會有黨

逆瑾怨司馬劉公大夏而誣以重罪者。武宗下大臣議力辯之。人多洪勇於附善，不避權倖。已巳冬，部長缺，資望及洪而瑾方納賂爲有力者所得，弗意動。未幾，遂有留都司寇之命。寧河王鄧愈之後，有兄弟爭所。賜田宅者。詔南京三法司覈之。其兄倚瑾爲援而求勝焉。洪不從，遂忤瑾，令致仕。辛未，子山以刑部主事遭恩例進資政大夫。嘉靖元年，又進資德大夫。正治上，卿家居十五年，因族寢盛，懼其久而漸疏，如塗之人也。作譜以明其宗。嘉靖乙酉卒，年七十八。爲人和而不移，莊而不倨。始仕卽以立齋自號，故評者謂其庶幾能與人爲善云。劉纓，字與清，號鐵柯，其先本江西清江人，徙吳縣。成化辛卯領

應天府鄉薦。戊辰登進士第。明年出知武陵，視縣事若素習。然有長賦而忘粟若干斛者，郡坐以侵欺罪死。止以亡失擬之分守官，閱其牘曰：此良法吏也。卒從所擬。庚子，以母憂歸。終喪，改知滕縣。縣久凋敝，至則蠹強鋤，而以惠利字之。婦抱兒涉瓜畦，守者挑之不從，納數瓜，誣爲盜。纓以兒與瓜，令守者併抱之，墜地，乃曰：爾謂抱兒之婦能取爾畦中瓜，非誣邪？懲而遣之。其鈎撫精敏，類此。邑人無不愛，且畏之者。居三年，以辦治稱。詔入爲河南道監察御史。弘治戊申，出按福建沙縣。民陳富謀利，其妻姪鄧釗之產，爲匿名書誣釗殺父，并及釗所親昵者二人。獄已成矣。纓密訊諸里人，則釗父實以負債不能償而自刎也。

論富如法而三人得釋莆田人有隨母出嫁而割股療其繼父者有司以孝聞纓曰虧父體以濟父讐孝如是乎衆皆屈服琉球人貢挾贗貨與閩人通輒構隙而鬪纓以爲大傷國體下令禁之後遂以爲法辛亥出按廣東東莞豪民張政家海澳嘗通番殖貨黃緣公牒得捕盜海上欲奪珠市世業者十人之利悉誣爲盜繫死者七人矣餘將論決及讞得其情立破械出之而以政抵死指揮倪鳳以捕盜縱橫尤甚然聞其陰養死士急之恐變乃以他文誘政而殺之守臣妄奏俘男千數可宮以給用者有 詔往取鬻海南良子家以充腐且三百餘人矣乃兼程渡海覈實直管押官方繫小兒五百人艤舟德慶卽日縱遣之

其家人感恩皆曰非劉公吾世珍矣癸丑還 朝推闕奏疏會諸道缺官印皆署嘗率同官劾外戚語侵中官忤 旨下獄賴孝廟仁明特杖而釋之在道九年兩按大藩劾罷監司守令而下不職者三十六人罪諸舞文者百三十餘人平反情罪之可矜者百二十三人一時稱爲才御史丙辰擢太僕寺少卿時馬耗且多私鬻遇印稜率滌去舊文抵數立法審辯其弊始清旣久條列利害當興革者二十事越五年庚申進都察院右僉都御史巡撫四川兼理松藩軍務先是撫臣畏險遠未有履行邊境者纓曰夷弗靖則全蜀騷然吾可自逸而馳其防也乃乘竹兜度索橋偏行列寨因細察其事端則知諸戍事與番族犬牙緩

則挑釁急則連和而其弊在我者大都什七及我使行邊恐夷出擾則又預置綵幣羊酒於扼塞以賄之謂之買路乃具爲禁令官軍遵奉惟謹夷亦帖然在蜀甫一年感疾亟乞歸 詔予告俟平復用越四年乙丑御史龔元言其練蜀事吏部卽奏起之得再鎮蜀木匠兒子諸番方掠樑新堡勢甚猖獗乃親駐境上遣官兵討之前後俘斬千餘賊懼皆投兵羅拜誓不再犯捷聞 璽書獎勵有白金文綺之賜又橫梁向向道及蒲江廢關數苦諸番鈔掠乃奏各立分司以守之自是邊鄙不聳全蜀方賴以安會逆瑾議省巡撫亦例罷蓋正德丁卯四月也其年八月復奏 命巡撫湖廣初在蜀嘗議闢自夔抵荆之路可以避

江險通行旅人甚稱便而瑾怒纓不先奏請以爲專輒逮赴

詔獄欲加之罪賴廷臣論救釋斬守余忠爲荆藩所訐遣法司會

訊力爲奏辯得減死論戊辰陞南京大理寺卿尋召入爲兵部

右侍郎崇明盜起權募民應敵所司請如官軍月廩之纓曰往

年有借關隴民兵討峒蠻而給月廩者其後竟隸尺籍人方恨

之茲可踵其弊邪事遂寢越二年庚午陞南京刑部尚書在任

三年獄之大小必當于情法乃已靖江有豪民緣姦殺傭婦而

坐死者因所知以千金丐免纓不可入竟死焉癸酉三月考滿

赴京疏三四上准致仕嘉靖壬午以 兩宮尊號又進階榮祿

大夫癸未三月十六日以疾卒年八十二

孫需字孚吉江西德興縣人成化壬辰進士授常州府推官十四年擢南院四川道監察御史二十三年陞四川按察司副使弘治七年丁憂十年服滿補湖廣副使未任陞浙江按察使十二年歷陞浙江左布政使十五年陞都察院右副都御史巡撫河南地方十七年改撫陝西地方十八年改撫治鄖陽地方正德二年陞南京兵部右侍郎四年陞南京禮部尚書尋令致仕六年起南京工部尚書八年改南京刑部尚書諸司獄必親筆削處讞皆審慎人無冤稱甲戌改南京吏部尚書詳南京吏部陳壽字本仁號蠹齋其先江西新淦人洪武間伯祖志敬坐事謫戍遼東喪明不能往一子當代役弟志弘慨其兄養無所托

請代戍遂籍於遼東寧遠衛壽補衛學生成化乙酉舉遼東鄉薦壬辰登進士性孤特不務矯訐甲午授戶科給事中丙午轉左給事中丁未進都給事中弘治戊申吏部薦爲大理寺丞尋調南京光祿寺少卿又擢南京鴻臚寺卿庚申被簡命爲都察院右僉都御史巡撫延綏癸亥滿九載遷南京都察院右副都御史時正德丙寅劉瑾竊柄矯詔令致仕癸酉以廷薦起改都察院右副都御史巡撫陝西未幾遷南京兵部右侍郎知政歸佞臣屢上疏乞休俱荷溫旨不允疏至九上武廟知不能留陞南京刑部尚書致仕有才望老成清謹素著之褒且令有司月給米二石歲給輿隸二名嘉靖改元詔進一品

階榮祿大夫以羊酒綵幣存問於家時壽之年八十有三矣其在戶科奉勅閱視宣大邊防劾去鎮守中官之不法者巡牧馬草場中貴有恃內庇侵尅者壽請置之法時貴妃萬氏專寵後宮兄弟勢撼京師中官梁方輩結妖僧繼曉干撓國是壽疏論之被逮繫詔獄尋得釋孝廟登極上封事指斥貴近無所避忌及遷大理為忌者所指摘王端毅公恕嘗疏辯之稱其正色敢言其巡撫延綏適大虜在邊羽書交至鎮城晝閉道塞不行壽分布兵馬為十路各屯駐要害死相應援多遣覘卒哨探惟謹軍勢大揚虜分兵入寇躬親甲冑為將卒先遇賊鏖戰擒斬八十有餘未幾火篩脫羅干諸酋糾率部落精兵大

至先以百餘騎誘我諸將請赴之壽曰虜衆未可當也自出帳擁左右數十騎據胡床麾指飲食如無事虜望見疑之遂引去既而諸路將領以壽方略邀擊賊皆大捷斬首若干級捷連上孝廟降勅獎勞賜賚加俸初延綏守臣以虜勢方熾鎮兵不能支請發京兵比壽屢捷而王師已至總制者請破其巢未得

命駐延綏久之戰馬三萬日給草束所費不貲壽議出境揚兵牧即採草紆急衆恐墮賊計壽請以身先之保無事所費省若干萬時同事者諷壽注子弟姪名戰籍中當有賞壽曰吾子弟皆不諳弓馬竟不許識者多之先是延綏守臣失事俱得罪代巡撫者難其人太宰倪文毅公岳薦壽或以為疑倪公以問楊一

清對曰是固儒將當不負公知也在鎮三年興利除害井井有
條十四年本鎮歲饑題准招商納糧區畫咸中事宜本年改南
臺其在南京值逆瑾竊柄勅令鈐束臺官不得妄言朝政
開讀畢壽正色論十三道曰言路豈可闕乎凡時政有當言非
劾某者仍稿呈舉行若因之阻抑則負朝廷負所學多矣臺
諫以言事忤逆瑾盡被執械繫京師壽與兵部尚書林瀚上疏
論救壽又獨疏極言俱不報林瀚既得罪去未幾壽亦罷歸瑾
復搜剔壽前任事諷所司文致罰米若干石稱貸以完家素無
積至是益貧不能給朝夕瑾誅言官交章薦之會陝西巡撫缺
人陝西兵荒之後兵民敝甚鎮守大監廖堂與其弟鵬姪鎧怙

勢以逞椎剝無厭禍且及士夫家人人重足立吏部尚書楊一
清謂必得忠鯁輕去就者制之乃薦壽下車旬日卽揭榜諭衆
利病之原罔不悉具仍令長安父老面陳得失量斗斛平時價
禁有司官市民物偶劇盜數十標掠良民捕之枷於市俱折其
兩股盜賊屏息又令下曰遭喪不許停柩姻嫁不許索財人皆
遵之夏大旱令各街巷開渠以通陰氣減刑殺清冤獄齊心誠
禱天乃大雨歲不饑仍因關中薦災乞停逋負錢糧罷額外貢
獻俱報可時堂稱旨造絨氈帳幄數百間料價數十萬兩壽至
已完解廉知其贏餘數萬兩欲輸內權貴檄所司留以備賑仍
戒諭此後不得指進貢有所科取不然吾且執奏堂兄弟訴於

所怙者欲圖中傷之遂乞歸四入疏不得請始復視事先是鎮守爪牙惡少數十輩散遣於各郡縣衛所漁獵滋甚壽下令捕之皆逃歸氣焰大沮民稍安已而改南兵侍郎報至軍民數千人擁集撫臺泣留壽壽曰君命也出城之日號呼之聲震地擁肩輿移日不得行陝之人至今能道之至留都知政歸帷幄佞臣屢疏乞休荷溫旨不允疏九上乞休進南京刑部尚書致仕有才望老成清謹之褒且令有司月給米二石歲輿隸二名以貧不能歸流寓南都敝屋頽垣不蔽廳事杜門寡交動遵古道今上改元詔進一品階榮祿大夫以羊酒果品存問於家是年九月卒於寓第貧無爲歛京兆寇公天敘大司空李公

充嗣哭臨爲備殮具因具題

賜祭二壇壽釋褐登仕籍至退

休四十年有奇大半在閑散地食祿任事蓋不甚久其建明樹立多可述而廉名爲尤著居常布素如寒士老無所於歸諸子旅寓飄泊環堵蕭然空舍四壁立凡數歲親舊共資助之僅僅歸其喪宦輒所至人懷去而思之在陝雖未久而得人心爲最深若其孝於親友於兄弟歸故人之喪卹其孤諸事尤立政之本云

大學士楊一清云予聞公在諫垣所論時政指陳得失無隱惟不喜彈劾曰吾父戒我勿作刑官枉人而言官枉人尤甚顧可輕耶於戲宋王素爲諫官曰人才難得無事之時當爲朝廷

國朝及鼎新 卷之五十一 四首卅五
愛惜程明道爲御史告於君曰使臣捨遺補過則可若搜索臣下短長以沽直名則不能公之心其類是乎蓋公有趙清獻之清張忠定之定云

應天府府丞寇天敘題云訪得陳壽賦性廉介入仕四十餘年俸廩之外秋毫無取致仕之後不能聊生身歿之日無以爲殮家口衆多歷官南京日久見有十喪未舉子孫貧殆難存活人所共知莫不嘆惜

鎮守淮安總兵官楊寵奏云切照南京刑部已故致仕尚書陳壽歷官三十餘年矣貧不能歸流寓南都株守如故杜門寡交動遵古道身歿無以爲殮子男七人兩以疾廢兩沒於病俱無

立錐之地尚有幼子不能婚娶九喪不能營葬二妾孀居饑寒迫切甘貧固守家範不替又足以見本官身教有素後多遺美因無門生舊知故其言行鮮有知者守廉之報一至於此誠可哀憐仰惟 皇上纘承大統聖政維新矜孤恤寡率土歸心如本官者今雖歿於九原迹其平生履歷正所當表揚以風示天下者也

戈瑄字良玉別號修溪其先浙江嘉興人曾祖諱惟善永樂中坐事遷河間之景州家焉瑄成化辛卯舉於鄉乙未登進士授河南嵩縣知縣先是嵩多逋稅又礦徒不時發瑄謂此不可以急治也乃寬徭役廣措置專務以德化民視歲之豐凶爲補徵

之多寡積數年逋盡償民賴不罹於罔政暇輒躬巡近礦民居
論以禍福使得自新礦患亦稍稍息邑人歌思之辛丑召爲廣
東道監察御史督通州倉剔抉宿弊癸卯以父喪去位服闋復
除廣東道監察御史會萬妃舞寵率同官上章論之憲廟
震怒撻之午門或尤其戇瑄曰進言受責何辱之有復上疏獨
論不報丙午巡按南畿弘治己酉命刷南京文卷所至著有風
裁以繼母喪守制癸丑復任推掌三法司事甲寅陞四川按察
司副使撫治重夔保順等府地故多盜負山出沒瑄至明約束
布威信雖偏鄉僻邑必躬臨俯綏召父老諄諭之俗爲丕變又
奏請於湖陝相出入之地若利州施州等衛宜統於一庶可責

成上從其言令易勅行事蜀人乃安壬戌陞山東按察使剖
決滯獄囹圄爲空歷城人有兄弟異居者弟盲人也置肆酤酒
頗獲利兄嫂屢嫉之弟憤恚自縊弟婦奔告兄嫂輒怒併酒保
縛之解弟縊死不殊以麵軸提殺之遂乃以謀殺親夫愬有司
鍛鍊獄成婦及保誣服瑄至皆稱冤鞠之云其夜有二軍主於
其家宜知狀趣二軍對區別研審得其情坐兄嫂以罪弟婦及
保得釋人以爲神乙丑陞浙江右布政使正德丙寅轉江西左
布政使丁卯陞南京都察院右副都御史戊辰改都察院左副
都御史時丹山屠公掌院事瑄佐之有所執論屠公輒欣然稱
善嘗奉勅清查牧馬草場辯疆界嚴條約不爲權勢怵時劉

瑾專政疾其違已追論浙江布政時事前後罰米七百五十石再陳休致不允改南京大理寺卿庚午陞南京刑部右侍郎辛未改刑部左侍郎奉勅勘岷府事賜羊酒寶鈔壬申陞南京右都御史掌院事甲戌陞南京刑部尚書乙亥三年考績上疏乞休不允賜誥命已卯於是六載矣復懇乞骸骨詔慰籍賜勅給驛還鄉仍令有司月給米三石歲撥人夫三名以示優異瑄既致仕優游山林鄉邦宗族每欣然相遇視其言動以楷式處兄弟待寡嫂撫孤姪曲盡恩禮婚喪有弗舉者輒助之會上兩宮尊號詔進階資德大夫正治上卿卒年七十有五金獻民字舜舉四川成都府綿州人成化甲辰進士除行人弘

治四年擢浙江道御史十一年陞山東按察司副使十五年守制十八年補湖廣副使正德二年陞湖廣按察使本年謫爲民五年起貴州按察使本年守制七年補山東按察使八年歷都察院左僉都御史巡撫延綏等處地方本年回院管事九年陞都察院右副都御史十三年陞刑部左侍郎十五年陞南京刑部尚書十六年改都察院左都御史掌院事詳兵部

趙鑑字克正山東壽光縣人成化丁未進士授知蕭山縣在縣廉愛有惠政擢監察御史歷視馬政鹽法奉命按宣大出知安慶府旋改順德府瑾誅乃擢浙江叅政陝西右布政使進右副都御史巡撫甘肅歲大侵上疏請內帑及貸富人貨緡易粟

隨所在給以粥食全活甚衆又令官給牛種勸之使耕次年遂大穰又浚渠招屯募民益兵邊務大修又却吐蕃復哈密奪地改視南京院事復命理閩浙鹽法入視院事轉大理卿鑑於法比素精覈而宅心平恕歷南京刑部尚書嘉靖二年改刑部尚書詳刑部

邊憲字汝成別號桂巖直隸河間府任丘縣人十歲能爲韻語書過目輒成誦既長學於少傅楊公一清與太宰喬公宇司馬金公獻民爲同門蔚有文譽楊以遠大期之成化甲辰登進士授青州府推官時甫弱冠人皆以少易之憲發奸讞獄如老吏郡中無不畏服青濱海海溢壞民田廬將及城率衆築堤障之

城恃以無恐值歲饑議賑撫按以事檄之乃計口給食處之有法所全活甚衆又屬均六府之役其輕重盈縮一視貲之高下里書奸莫能售皆便之弘治癸丑擢湖廣道監察御史奉命按山西復按宣大所在別白賢否裁抑貴勢風采凜然陳邊務數事皆爲上所嘉納又奉命至遼東覈實邊儲諸宿蠹剔抉殆盡兵出宣大受紀功之命人不敢請寄賞陞淮安知府以父憂歸服除改鳳陽不兩歲積備賑米至餘萬石正德丁卯陞浙江按察司副使時逆瑾竊政欲士夫阿已往往假他事羅織爲罪而罰米以困之憲所罰二千餘石然竟不肯少挫以阿瑾意庚午陞按察使尋轉布政司右布政皆有政聲辛未陞都

察院右副都御史巡撫山東畿甸流賊入界內遣官分禦多所
 斬獲嘗荷 勅獎勵且有金帛之賜明年會賊勢益熾言者請
 罪一二重臣以示警憲與保定巡撫蕭公翀俱就逮繫獄旬歲
 賊平以舊職謝病家居甲戌復起巡撫寧夏至則築垣塹蓄芻
 糧凡邊之備罔有不飭嘗禦虜於花馬池斬馘若干虜遭挫劫
 而遁又禦之於紅兒山五日七捷事聞 獎賚有加丁丑陞南
 京刑部右侍郎巳卯改戶部右侍郎以母憂歸服除舊職總督
 太倉疏漕運數事皆利弊所當興革嘉靖元年轉左蒞部事二
 年陞南京刑部尚書三年 召改都察院左都御史未任過家
 卒年六十一詳都察院

孟鳳卽臧鳳字瑞周號梧岡山東曲阜人父紀由舉人任華亭
 訓導鳳初生與伯兄麟同祗伯兄諱麟登成化甲辰進士累官
 右布政使公少與兄同學日授數千言疊疊成誦故學殖益弘
 淵而不匱爲文辭簡潔流暢敏而有章弘治巳酉發解山東庚
 戌登進士第時 朝廷重守令求治於親民壬子選知嵯縣嵯
 浙東巨邑齒繁而賦殷公勤農桑興學校使之利安又礪石甃
 堤百八十丈以障水衝民甚便之於是材譽益彰撫巡交薦天
 官考績有公勤敏慎之褒戊午徵拜福建道監察御史丁內艱
 辛酉服闋改浙江道嘗督馬政監抽分巡視南城查點下場馬
 匹事不憚勞翕然修舉壬戌巡按宣大時北鄙多警公肅憲度

以振戎備虜聞之不敢侵軼甲子巡按江西值寧藩潛畜異謀公一處以正折其機牙比及代不能少逞在道七年疏屢上未嘗示人人問之荅曰揚人之過以爲己名予弗忍也丁卯陞懷慶府知府卽其治邑者推廣之挈綱維布條約倡僚屬以興教化均徭平賦扶善抑奸開惠通河漑民田二千餘頃暇則進諸生語以爲學讀書作文之要得人滋多辛未陞山西左叅政懷慶士民懷其德政爲之立祠巡撫鄧公奏欲留公壬申改河南左叅政督理糧餉屬流寇猖獗提督彭公率官軍追勦引公自輔公雖司犒賞稽餽饒而匡贊寔多寇尋殄滅癸酉督運至京輸納以速而餘羨有歸公私稱便陞河南按察使又卽其持憲

之素而作新之夙興蒞事祈寒暑雨弗休書所行者于壁而日稽銷之吏屬警畏刑獄爲之一清甲戌陞山西右布政使屬天官奏舉方岳以行旌異之典公首與焉尋轉河南左布政使務持大體略細苛旬宣之政旣舉而案牘出納纖悉必明十年陞巡撫保定右副都御史丙子陞都察院左副都御史丁丑調巡撫順天等府地方公督郡邑嚴察舉飭兵戎罷庸懦畿徼以寧後以攘敵功屢有錦襲寶楮之賜戊寅改提督漕運公以漕政久弛悉心經畫選能以任功剔蠹以祛害運舟相繼而上國賦以充庚辰兼巡撫鳳陽等府地方威信素著禁令益行第以河溢徐邳田廬湮沒聖駕南巡之後儲峙一空公乃奏免常租

裁縮冗費民之死徙者稍用甦息又建徐節孝陸丞相祠延學者讀書其中以作人才以厚風化辛巳陞刑部右侍郎適世廟入承大統旁求峻望以靖邊郵命公以本官兼左僉都御史提督宣大三關等處軍務公恐邊儲馬匹不足以濟具疏陳情上嘉納之給以內帑公至選將領作士氣明賞罰謹烽堠虜懼弗復入間一入焉雨雹交作挫衄而去公曰此天威也有希功者執遊僧乞丐數十人以爲奸細公力辨於朝竟得全活癸未七月奏復孟姓六載考績進階尋轉左侍郎甲申陞南京刑部尚書公以留都雖舊聖化維新精白一心以伸邦禁不徇於情不撓於勢始或議之終乃貼然以服公入官三十七

年歷事三朝清慎勤固無一息之違而忠孝大節尤所致謹蓋公之學知求於內故於寢門大書戒慎恐懼四字俾出入觀省則公之脩諸身達於宦業者槩可知矣

聶賢字承之四川重慶府長壽縣人弘治庚戌進士五年授武昌知縣七年調麻城知縣十一年擢山西道監察御史十八年巡按廣東正德元年避逆瑾養病五年瑾敗起雲南副使七年以憂去九年起補湖廣副使十二年陞湖廣按察使十四年陞湖廣右布政使十六年陞河南左布政使本年陞都察院右副都御史提督南贛汀漳等處軍務采羣議以灤州十一畝清遠九畝置大埔縣隸潮州又以潮陽惠來等都惠州海豐城龍溪

都等地方置惠來縣隸潮州以便控制嘉靖四年改南京都察院右副都御史兼督操江本年陞南京右都御史掌院事五年陞南京刑部尚書本年改都察院左都御史掌院事起刑部尚書

李承勛字立卿湖廣武昌府嘉魚縣人弘治癸丑進士授直隸太湖縣知縣久之補南京刑部山東司主事歷山西司員外郎廣西司郎中會以憂去及服闋仍補南京工部虞衡司郎中未幾陞江西南昌府知府正德六年陞浙江按察使事丙子進陝西右布政使十四年轉河南左布政使十五年陞都察院右副都御史巡撫遼東嘉靖二年養病四年起南臺五年轉南京刑

部侍郎進尚書六年召入吏部會新進用事從中沮尼道改刑部詳兵部

方良永字

福建興化府莆田縣人弘治庚戌進士授刑部

廣東司主事九年養病十二年補刑部貴州司主事本年陞廣東司員外郎十三年陞廣東按察司僉事十八年丁憂正德三年致仕起陞湖廣副使八年陞廣東按察使本年陞山東右布政使九年陞浙江左布政使十年致仕十六年起陞都察院右副都御史撫治鄖陽等處地方嘉靖元年侍養二年丁憂六年起原職巡撫應天等處地方未任本年陞南京刑部尚書未任卒於家謚簡肅

國朝外明紀 卷之五十一 四
高友璣字肅政浙江樂清人弘治庚戌進士授南京刑部主事
歷員外郎郎中十六年擢守九江聲稱大起正德元年陞廣西
右叅政五年陞江西左叅政尋轉山西按察使七年陞陝西右
布政使八年擢右副都御史巡撫大同所至達政體風采峻整
忤貴倖數見裁抑十年坐是降二級致仕後起爲兵備榔桂副
使丁外艱未赴十四年以薦起爲山東右叅政十六年轉福建
右布政使本年 召爲光祿寺卿嘉靖二年陞南京刑部右侍
郎四年轉右都御史總督漕運江淮六年進南京工部尚書七
年改南京刑部已而召爲刑部尚書詳刑部

何詔字廷綸浙江紹興府山陰縣人弘治丙辰進士授南京工

部主事嘉靖癸未任福建右布政使乙酉陞巡撫保定右副都
御史提督紫荆關乙亥陞工部左侍郎八年尋陞南京刑部尚
書未任尋改南京工部尚書

周倫字伯明號真菴直隸崑山人弘治壬子領鄉薦丙辰中會
試已未登進士第觀政工部授保定府新安縣知縣公勤愛人
法懲愆違連年蝗旱水溢爲平役發賑省科費寬馬政民賴以
安甲子 召爲山東道試御史乙丑實授卽言 孝廟上賓內
宮不宜作佛事及免近邊州縣進香正德丙寅奉 勅閱實邊
關遠近嚴飭聞父病以疾告歸九月抵家翁已下世逆瑾用事
惡倫以養疾違限勒命致仕又摭倫曾薦都御史雍泰爲黨比

及巡庫二次罰米三百石傾產完納不以干人庚午瑾誅十一月復其官壬申八月始赴京復除江西道御史疏拯宿弊以裨聖政五事薦忤瑾廢棄大臣謝遷劉大夏翰林科道許誥許讚李熙等十數餘人乞起用詔可癸酉巡按山西虜入寇忻代劾權近總兵官神周疏命各鎮兵馬不許自分彼此務要互相策應自後聲勢大振奏築大原南關新城條武等關土堡十一座堞口壕塹共一萬五千餘丈至今賴焉甲戌赴京奉勅點閱京營倫條陳八事宿弊剗革朝儀久弛請加整肅五年審錄天下罪囚例久不行倫疏極言之遂復舊例冬遣大監劉允送番供於外國倫疏極言停止留中不報丙子陞南京大理寺寺丞辛巳六月陞大理寺右少卿嘉靖元年壬午陞左少卿以改元郊禮有白金文綺之賜六月陞都察院右僉都御史丁母憂乙酉服闋以舊官改南京理院事提督操江丙戌六月陞本院右副都御史七月疏論江防事宜大有興舉十二月以災變自陳休致不允丁亥四月會同考察南京官屬去留允當五月陞南京工部右侍郎六月改兵部右侍郎十二月命協理都察院事戊子正月陞左侍郎十一月陞南京刑部尚書己丑五月改刑部尚書八月履任命侍經筵九月奉特旨改南京刑部尚書有時相以諫官論去位勅刑部逮問其私人李夢鶴等時相在位者請解其事倫以公道律例俱在爲言因改倫官司

丞辛巳六月陞大理寺右少卿嘉靖元年壬午陞左少卿以改元郊禮有白金文綺之賜六月陞都察院右僉都御史丁母憂乙酉服闋以舊官改南京理院事提督操江丙戌六月陞本院右副都御史七月疏論江防事宜大有興舉十二月以災變自陳休致不允丁亥四月會同考察南京官屬去留允當五月陞南京工部右侍郎六月改兵部右侍郎十二月命協理都察院事戊子正月陞左侍郎十一月陞南京刑部尚書己丑五月改刑部尚書八月履任命侍經筵九月奉特旨改南京刑部尚書有時相以諫官論去位勅刑部逮問其私人李夢鶴等時相在位者請解其事倫以公道律例俱在爲言因改倫官司

屬皆下獄落職倫無愠色十月抵南京命各司日報囚數朔望稽勤惰官曹肅然獄不留滯又上疏推明律七事皆行辛卯三月以郊恩頒賜誥命進階資政大夫凡二次奉旨會同審錄重囚矜恤明允壬辰倫年七十八月考滿九月 陛見倫自七月至是凡自陳乞休三次 上皆慰留吏部具題考滿奉旨復職癸巳赴南京復任四月會考本部司屬黜汰甚當五月上疏懇辭 上慰命致仕倫歸鄉杜門屏迹養高怡神率耆舊為延景約簡樸真率大義欲厚俗興禮告訓鄉族以義讓節儉人皆忻服巳亥卒享年八十

國朝列卿紀卷之五十八

國初刑部左右侍郎年表

盛原輔

元年任詳吏部人洪武

張仁

才洪武元年任人人

程徐

詳本部尚書洪武二年改任

左安善

舉洪武二年任人薦

王琮

司令洪武四年任人任磨勘

李質

詳本部尚書洪武五年任

呂本

直隸鳳陽人故元都事洪武五年任

李儼

見本部尚書洪武五年任

高 暉 人 洪武六年任

黃 欽 人 洪武初薦舉六年任

李 敬 臣 陝西鳳翔人 洪武六年陞任

李 浩 人 洪武初薦舉七年任

茹大素 山東澤州人 洪武四年鄉舉七年任

臧 哲 人 洪武八年任

張 謙 江西南昌人 洪武初舉文學八年任

黎 光 廣東廣州人 洪武初子鄉薦九年任

顧 禮 直隸崑山人 洪武九年任

劉 敏 直隸河間人 洪武十三年任

秦 琰 山東濟南人 洪武庚戌鄉舉十三年任

李 儀 山東濟南人 洪武十四年任

楊汝賢 人 洪武十五年由助教起試侍郎

王希哲 人 洪武十五年任

葛 脩 人 洪武十七年任

周 邦 人 洪武十七年任

邵 質 人 洪武十七年任

徐文顯 人 洪武十七年任

張文昱 直隸上元人 洪武十八年任

歐陽性 直隸蘇州人 洪武十八年任

高鐸 山西絳州人進士 洪武十九年任

謝祥 洪武二十一年任 人薦舉

朱浚 浙江縉雲人洪武中 舉明經二十一年任

趙勉 見本部尚書洪 武二十一年任

凌漢 河南原武人秀才 洪武二十一年任

邵永善 浙江仁和人進士 洪武二十一年任

黃紹祖 洪武二十二年任 人薦舉

祁鑑 洪武二十三年任 人薦舉

李似初 洪武二十四年任 人薦舉

周志清 洪武二十四年任 人薦舉

蔣毅 浙江長興人薦舉 洪武二十六年任

和希文 山西平定人洪武中舉 明經二十六年任左

王良 河南祥符人洪武二十六 年任右三十二年任左

宋性 山東德州人國子生 洪武二十九年任

薛賓 山西夏縣人歲貢 洪武三十年任

廣脩 湖廣監利人由鄉舉 洪武三十年任右

李文吉 洪武三十年任 人薦舉

胡子韶 四川榮縣 人儒士任

劉季篔 浙江餘姚人 進士任左

墨麟 陝西高陵人舉人 革除四年任右

金

純

直隸泗州人監生革除四年任

盧

祥

直隸房山人國子監生永樂元年任

李

慶

直隸順義人監生永樂元年任

趙

犴

河南祥符人舉人永樂二年任

左

獻

直隸廣宗人太學生永樂五年任

楊

泰

直隸山陽人薦舉永樂五年任

吳

盛

直隸景州人進士永樂六年任

張

本

山東東阿人國子監生永樂七年任

任

勵

陝西長安人進士永樂十年任

張

忠

直隸開州人國子監生永樂十二年任

楊

勉

應天江寧人永樂甲申進士十六年任

國初刑部左右侍郎行實

盛原輔字

人吳元年擢承事郎監察御史本

年修大明律令命為議律官陞大理寺少卿洪武元年陞刑部侍郎本年調山東行省叅政累官吏部尚書詳國初吏部

張仁字

人國初以人才薦舉洪武元年陞

刑部侍郎

程徐詳本部尚書洪武二年任侍郎

左安善字

人國初薦舉洪武二年拜刑部侍郎

郎三年調河南知府後卒於官

王琮字

人任磨勘司令洪武四年任

李質詳本部尚書洪武五年任侍郎

呂本字

直隸鳳陽府壽州人故元為元帥府都事丙午年

歸附授中書椽史吳元年授湖廣行省照磨洪武三年陞中書省右司郎中四年改左司郎中五年陞刑部左侍郎進吏部尚書六年改太常寺卿詳吏部并太常寺

李儼見本部尚書洪武五年任侍郎

高暉字

人洪武六年仕本年四月改福建行

省叅政

黃欽字

人洪武初薦舉六年拜刑部侍郎本

年免

李敬臣字

陝西鳳翔府鳳翔縣人洪武初以人才舉

六年陞刑部右侍郎本年免

李浩字

人洪武初薦舉

七

年陞刑部侍郎本年使琉璃後卒於官

茹大素字

山西澤州人洪武四年庚戌鄉舉上萬言書稱

旨擢監察御史五年設四川提刑按察司擢按察使執法平允七年召為刑部侍郎本年降刑部主事九年十二月上書論時務五事累萬餘言上令中書郎中王敏誦而聽之虛文多而實

事少其切要可行者四事纔五十餘言因喟然曰為君難為臣不易朕所以求直言者欲其切於事而有益於天下國家彼浮

詞者徒亂聽耳。遂令中書行其善者，且爲定式，頒示中外。使言者直陳得失，無事繁文。詳國初戶部尚書。

臧哲字

山東青州府諸城縣人。洪武中以儒士舉爲兵馬指揮，發奸摘伏，不避權豪。朝廷嘉之，賜白金鞍馬。八年陞刑部左侍郎，有才幹，調四川行省叅政，歷陞廣西布政使，以廉介稱。丁憂家居，勅賜米錢旌之，後卒於家。

張謙字

江西南昌府南昌縣人。明經，飭行初職，教東湖宗廉兩書院。洪武初，有司以文學舉，拜監察御史，尋辭歸。八年布政李宜之再舉明經入朝，講周易，劉向說苑，稱旨。吏部覆試第一，陞刑部侍郎。文行蔚有時名，十一年以老乞致仕。

黎光字仲輝，廣東廣州府東莞縣人。博學能文，倜儻有奇氣。洪武壬子膺鄉薦，釋褐拜監察御史，正色立朝，卓有風裁。常巡歷蘇州，民罹水災，缺食，具實以聞，得蒙賑濟，存活者甚衆。及巡歷鳳陽，所上封事皆切時弊，遂受知於上。其在朝也，執法不阿，爲御史大夫陳寧所忌，陞刑部侍郎，纔三閱月，陳以他事中之，竟卒於謫所，人皆惜之。

顧禮直隸崑山人。洪武初徵舉，九年任刑部左侍郎，十一年起戶部，十二年拜戶部尚書，詳戶部。

劉敏字

直隸河間府肅寧縣人。洪武三年舉孝廉爲中書吏，十二年受知，太祖特擢工部侍郎，善於其職。十三年改刑

部右侍郎詳獄明允十四年出為徽州府同知有惠政尋卒於官

秦琰字 山東濟南府歷城縣人洪武庚戌鄉舉

十三年陞刑部左侍郎以才行稱十六年以年老致

仕

李儀字 山東濟南府鄒平縣人洪武辛未進士

十四年陞刑部右侍郎十五年免

楊汝賢字

人任國子助教洪武十五年七月

起試刑部右侍郎

王希哲字

人洪武中薦舉十五年任刑部右

侍郎十六年伏誅

葛脩字

人洪武中薦舉十七年任刑部左侍

郎十八年坐同尚書王惠迪盜官糧伏誅

周邦字

人洪武中薦舉十七年任刑部右侍

郎本年免

邵質字

人洪武中薦舉十六年任都察院右

僉都御史十七年任刑部右侍郎十九年致仕

徐文顯字

人洪武中薦舉擢給事中十七年

陞試刑部右侍郎十八年免

張文昱字

應天府上元縣人洪武中舉人才擢邵武府知

府有惠政十八年陞刑部左侍郎十九年致仕

歐陽性字直隸蘇州府吳縣人洪武四年以儒士徵授靜

寧知州九年陞漢中知府以父憂去任十二年起補東昌府十

八年來朝吏部考其稱職陞刑部右侍郎二十一年卒於官

高鐸字仲順山西平陽府絳州人沉潛經史以博洽著聞洪武

甲子解元乙丑進士擢監察御史才識明敏十九年言事稱旨

拜刑部左侍郎二十一年以失職被劾降都察院右僉都御史

詳國初都察院

謝祥字人洪武中薦舉二十一年任刑部右

侍郎本年免

朱浚字浙江處州府縉雲縣人洪武中舉明經授猗氏知

縣以政績著聞受上知二十二年陞刑部右侍郎尋卒於官

趙勉見本部尚書洪武二十一年任左侍郎

凌漢字斗南河南原武人洪武十七年擢司經局正字未幾出

知會稽以事逮繫浙江按察司獄會按察使陶晟在京上知

漢無罪獄為晟所淹命械晟還釋漢與俱來既至拜監察御史

巡按陝西奏陝西民病數事且言古人謂丈夫出疆有可以安

國家利社稷者專之可也臣竊以為在春秋戰國則可在今大

一統之時則不可苟許其專恣啓大臣擅權之漸上善其言

召其子賜鈔二百錠衣一襲二十一年又以不受私遺陞右副

都御史尋陞右都御史時詹徽爲左都御史論議數不合每面折徽徽銜之奏遣按事蘇松還朝以失職爲監察御史桂滿所劾左遷刑部侍郎二十四年命署吏部數月改禮部右侍郎詳都察院右都

邵永善字

浙江杭州府仁和縣人洪武乙丑進士二十一

年陞刑部右侍郎二十二年轉左侍郎二十三年改兵部詳國初工部

黃紹祖字

人洪武中薦舉二十二年任刑部

右侍郎二十三年免

祁鑑字

人洪武中薦舉二十三年任刑部右

侍郎二十五年卒於官

李似初字

人洪武中薦舉二十四年任刑部

左侍郎二十六年卒於官

周志清字

人洪武中薦舉二十四年任大理

寺卿本年遷右副都御史二十五年任刑部右侍郎二十六年改戶部二十七年致仕詳國初戶部

蔣毅字

浙江湖州府長興縣人洪武中薦舉二十六年任

刑部右侍郎二十九年免

和希文字

山西太原府平定州人洪武中舉明經蒞職勤

能二十六年陞刑部左侍郎二十六年以年老致仕

王良字天性河南開封府祥符縣人

洪

武二十六年任右僉都御史二十七年遷刑部右侍郎建文中
爲刑部左侍郎辛巳五月坐問燕人罪輕左遷浙江按察使謁
岳飛墓誓曰苟愧武穆非人也壬午六月聞靖難師克城慟哭
以誓必死會命使召之良執使者下獄詰旦縛出期戮以徇
道中忽遇衆鼓譟而起奪使者去良還坐堂上收抱司印一浙
江東西道印五經歷司照磨所司獄司印三凡九印悉滕置於
篋携歸入門嗟嘆者久之妻問其故良曰我分應死顧思所以
處汝未決爾妻曰我則不難處君爲男子乃爲婦人謀乎遂命
妾顧良而抱其子歛歔如其廁先投於池而死良久往覓之子

匍匐池旁其鞋猶在頃浮良起殯殮畢積薪於閉戶戒其家人

毋得出

或云寫遺囑付家人

命妾抱幼子往某僉事家以宗祀爲托

或云良子

持方髻亂夜以托鄉人之商於抗者

遂舉烈焰以印投焰中與家人同赴火死時

六月二十一日也事聞於朝成廟曰死自其死朝印吾父

皇所制擅毀之特可罪耳詔徙其家於邊旣而風雨晦暝人或
見其出沒後官不敢營其宅居台人陳璲私識其事翰林編修
黃佐爲之傳正德戊寅按察使梁材始卽司門內東南祠之榜
曰忠節提學副使劉瑞萬潮皆記之瑞銘曰允烈王公安其靈
矣火其身不火其名矣億千百世赫且明矣謂文與事相稱云
宋性字

山東濟南府德州人洪武中由國子生爲刑部主

事以明慎受知於太祖二十九年命署刑部右侍郎三十年出為湖廣按察司副使革除中調陝西永樂元年陞四川右叅政尋進北京刑部右侍郎所至以廉能著名比卒人多惜之詳北京刑部

薛賓字

山西解州夏縣人洪武二十六年歲貢入大學授

刑部主事三十年陞署刑部右侍郎尋改北平布政司左叅政卒於官

李文吉字

人洪武中薦舉

二十五年陞都察院右僉都御史本年改少詹事尋復左僉都御史二十九年陞工部右侍郎三十年改刑部右侍郎革除元

年免

胡子韶字仲常初名志高字伯尚以避嫌改四川嘉定州榮縣人世居縣之東州鄉子韶富經術性忠介方孝孺為漢中教授講明理學往從之游蜀獻王賦詩贈之其後由儒士被薦至京師革除間為史官歷陞山東按察司僉事刑部右侍郎壬午八月十九日坐黨送鎮撫司九月十一日授戮年四十一正德中御史熊相於州治之西立祠祀之

劉韶字季篋以字行浙江紹興府餘姚縣人登洪武甲戌進士第授行人司行人嘗持節雲南四川朝鮮所至宣上德達民隱餽贐一毫無所受事聞賜鈔襲衣丁丑陞陝西布政司左叅政

先是陝有逋賦民積歲不能輸有司峻刑督之韶至慨然曰民困不能輸爲之父母又忍峻刑督之耶與其察謀分行郡縣解其繫緩其期勞來綏輯而從容勸誘民皆感激曰是矜念我我可不戮力以累仁人奔走假貸以輸無幾畢完陝不產礪砂而歲月有課額民窘不能償至或償其家者爲奏罷之洪渠水溢爲民患躬行視之爲設法治堰民賴以安蓋凡可以利民者率盡心焉在陝四年被召爲刑部左侍郎尤懇懇重民命平反數事陝平民王某爲強盜所引逮至而所引者已伏法不能自白乃召所引者之妻子使識之而聽其詞竟得實王免於誣有典守錢穀而虧免者旣被逮則援引千餘人同罪韶廉知其誣卒

辯所誣引者釋之河陽逆旅夜月朱趙二人異室而宿朱怨家後追至而誤殺趙朱實不知逆旅主人疑朱殺之追執送官鞫訊拷掠朱遂誣服不敢求辯韶獨曰是偶邂逅相聚非素有負且計其裝非有圖也特緩其獄遣人密察之無幾有司竟得殺趙者而朱以緩獄不死揚州民胡氏夜有賊人入其室殺人而遺刀屍傍旦視之柄有鄰家蘇氏私識官捕鞫蘇曰家失此刀久矣不服旣脩極諸刑竟誣服韶潛使持刀往察其鄰一童子識之曰我家物也遂得賊而釋蘇蓋其理刑一以求生爲務永樂乙酉纂修大典命太子少師姚廣孝禮部尚書鄭賜監修而擇有文學者一人爲之副遂以命韶討論裁處人多服之庚

寅坐失出入罪左遷兩淮鹽運判未行復留丁酉改工部營繕司主事躬勤治職未嘗以崇卑為意癸卯以疾卒年六十一

墨麟字 陝西高陵人洪武甲子舉人任北平副使革除

壬午年任右侍郎本年改兵部詳兵部

金純字德脩直隸鳳陽府泗州人任江西右叅政革除四年任

刑部右侍郎永樂三年命採木湖廣事集而民不擾八年遷本

部左侍郎九年還河淤塞 命純發河南運木夫開濬自開封

城北引水下達鄆城入魚臺場場口出穀亭北十里以修國初

時政事十年回京十四年改禮部左侍郎歷刑部尚書詳刑部

盧祥字 順天府房山縣人洪武三十年由國子生擢刑部

郎中華除中免官永樂元年陞北平右叅議本年陞刑部左侍

郎十年卒於官贈刑部尚書

李慶字德孚一字以善順天府順義縣人洪武末年以生員入

太學 文廟靖難以潛邸知遇命署僉都事永樂元年由紹興

知府陞刑部右侍郎五年改都察院左副都御史歷行在工部

兵部尚書詳兵部

趙玃詳南京刑部尚書由浙江右叅政永樂元年任本部右侍

郎二年轉工部

左獻字 直隸順德府廣宗縣人洪武中由大學生授戶部

主事永樂元年陞浙江左叅議五年陞刑部右侍郎本年以事

謫為辦事官七年復原職九年卒於官

楊泰字

直隸淮安府山陽縣人洪武中由薦舉刑科給事

中華除中陞北平按察司僉事永樂初年陞通政司左通政五年陞刑部右侍郎本年卒於官贈戶部尚書諡襄毅

吳盛字

直隸河間府景州人洪武丁丑進士授沔池知縣

考滿陞戶部員外郎永樂初年陞刑部郎中六年陞刑部右侍郎七年扈行在十年卒於官

張本字致中山東兗州府東阿縣人洪武末年由國子生擢揚州府江都知縣歷工部左侍郎六年坐累謫交趾永樂七年任本部右侍郎十八年扈巡北京二十二年陞南京兵部尚書尋

改兵部尚書詳兵部

任勵字

陝西西安府長安縣人洪武乙丑進士

永樂十年陞刑部左侍郎十一年卒於官

張忠字

直隸大名府開州人國子生自幼才識明敏在大

學有聲登洪武乙丑進士永樂初年擢刑科給事中十一年陞兵部右侍郎十二年陞刑部左侍郎十七年卒於官

楊勉字

見刑部侍郎永樂十六年任

